



h

## Pijan pucao pod šatorom i ranio gosta: Veljko Mikulić osuđen za pokušaj ubistva

Objavljeno: 20.11.2017. u 16:03

**Kantonalni sud u Širokom Brijegu nepravomoćno je osudio 52-godišnjeg Veljka Mikulića iz mjesta Kočerin u općini Široki Brijeg na godinu i mjesec zatvora zbog pokušaja ubistva i nedozvoljenog držanja oružja.**

Za krivično djelo ubistvo u pokušaju Sud je optuženom Mikuliću utvrdio kaznu zatvora u trajanju od jedne godine, a za krivično djelo neovlašteno držanje oružja ili eksplozivnih stvari kaznu zatvora u trajanju od pet mjeseci, te mu izrekao jedinstvenu kaznu zatvora u trajanju od godinu i mjesec.

Optužnicom Tužilaštva Zapadno-hercegovačkog kantona Mikuliću je na teret stavljeno da je 22. juna ove godine u mjestu Kočerin-Privalj, Široki Brijeg, u bitno smanjeno uračunljivom stanju zbog teškog stepena pijanstva, počinio krivično djelo pokušaj ubistva.

- Optuženi se tereti da se u improviziranom ugostiteljskom objektu - šatoru najprije verbalno sukobio sa drugim gostima, a zatim i fizički, nakon čega je otišao svojoj porodičnoj kući odakle je uzeo pištolj i sa njim se vratio do ugostiteljskog objekta. Po izlasku iz vozila optuženi Veljko Mikulić je repetirao pištolj i krenuo prema gostima, pa kad je to vidio oštećeni M. G. i pokušao ga zaustaviti, Mikulić je prema oštećenom ispalio tri hitca od kojih ga je jedan hitac pogodio u desnu nogu i nanio mu prostrijelne rane u predjelu desne natkoljenice - kazali su u Tužilaštvu ZHK.

Njemu je na teret stavljeno i to da je u svojoj porodičnoj kući držao automatsku pušku, četiri spremnika, te 1. 480 metaka, iako je znao da nabavka i držanje automatske puške i streljiva građanima uopće nije dozvoljena.

- Kantonalno tužilaštvo će nakon analize pismenog otpravka presude najvjerovatnije podnijeti žalbu na odluku o kazneno-pravnoj sankciji - najavili su iz Tužilaštva ZHK.

Faktor pratite putem aplikacija za **Android**. Pratite nas i na društvenim mrežama **Facebook** i **Twitter**. Zabranjeno je prenošenje sadržaja bez odobrenja redakcije. Kontaktirajte nas na [redakcija@faktor.ba](mailto:redakcija@faktor.ba).